

Augsburg, 24. Februar 1558

An Philipp Melanchthon

Herzog August Bibliothek Wolfenbüttel, Cod. Guelf. 108 Noviss. 2°, fol. 543r.

Edition: Clemen, Briefe an Melanchthon S. 38.

Regest: MBW, Regesten Nr. 8533 (Bd. 8, S. 194).

S. P. D. Vix perfricueram frontem, propter duos auditores meos datis ad te literis, cum aliorum impudentia me impudentiorem etiam fieri coegit. Quae excusatio etsi per sese leuis atque inanis est (neque enim aliena vitia imitari, sed nostra emendare debemus), tamen apud humanitatem tuam valebit aliquid. Multa enim in amicorum gratiam facimus, quae nostra causa non auderemus. Sed ne diu te detineam, grauiorib[us] rebus occupatum, Osualdus Eggius, Leonardi F[ilius], cuius nutu ante paucos annos gubernata est Bauaria, ut nosti, vir (quantum mihi cognoscere licuit) doctus, prudens et pius, filiolum suum cum magistro et famulo, tua causa potiss[imum] Vitebergam ablegat, vt is olim gloriari possit, se Melanthonem et vidiisse et audiuisse. Quamvis autem nihil ei mea commendatione est opus, qui vel suopte splendore, vel magnatum literis tibi commendabitur: tamen cuidam, cui nihil negare audeo, qui me quoque molestum tibi esse voluit, mos gerendus fuit. idq[ue] eò feci libentius, quod Eggium nihil magis in votis habere audio, quam vt syncera Euangelij doctrina in Bauaria colatur et propagetur. Ac quod ad populum attinet, facile, vt opinor, res conficer. Sed affinitates et consilia quorundam impediunt. Neque verò mihi dubium est, quin haec vna causa tantum apud te valeat, vt, si caeterae omnes abessent, libenter illi sis commodatus. Quare pluribus verbis non vtar, sed illud tantum a te petam, ne mea de tua singulari humanitate et erga me benevolentia persuasio, et amicis gratificandi voluntas, apud te mihi fraudi sit. Vale. Augustae Vindelicorum 6 Cal[endas] Martij 1558.

Hieronymus Wolfius.